

**Maki Nalua Naña Pol Siri
Pa Pan Li Nalelagaena Wa Lala
Nae Garu
KOREN
Visayuena Na Tusi Nene**

Komþasnen suniena plas na tusi nini

Maki na lua nene naña Pol siria pa li nalelagaena lala nae Koren, ana naga siria e pogos naña pane ke pogos m̃arera amio li nalelagaena lala e sum̃are nene nae Koren, naña laþasia sinela kar manene naga paþisi, ana akawelan naga. Ana Pol kila mareravan panila sape naga kiena sitomiena m̃arera ke na wa vena kila ruruen napiowaena nene. Naga sinenan sape naga amio la aimi ave erau wo sina, ana pisawal panila pisape kerara paþisi naña amlogear naga.

E komsusnen m̃aki na sumo Pol pisayu komin yane naga pis m̃arera e m̃aki na sumo tai naña siri pa pan la. A pisa naña naga kerara paþisi naña mloge sape apilon kiela sitomiena komin kiela milamulena viowa lala, a kila ruru napiowaena la naña sike pula, ana ape erau wo sina amio.

A siraunia, pisa panila sape monar akuwan kilavaru vena waren van kiela erau na lelagaena lala nae Yutea, la naña pe kiela sur re poli. E komþasnen luwasnen m̃aki nene, Pol pis m̃arera pa yaru la þas nae Koren naña la asape ape li nalologena wo kemua lelaga, ana asuñã akila

kare li nalelagaena la nae yo nene e kiela vianiena la naþa pe mesmesu re poli. Asumã apisa ke asape Pol naga pe nalologena kiena ne re Yesu Kristo lelaga poli, þisi na Pol pis mñarera vena suwoyon laena, a kila meraravan sane naga pe nalologena kemua lelaga kiena ne Yesu Kristo.

Komþasnen tusi la nini

Visena þesa 1:1-11

Pol amio li nalelagaena lala nae Koren 1:12—
7:16

Kilavaru naþa na warena va li nalelagaena lala
nae Yutea 8:1—9:15

Pol kila meraravan naþa naga pe nalologena
kemua lelaga 10:1—13:10

Visena maro 13:11-14

Visena þesia

¹ Erau lala, inu Pol nemio kieta puruvi naþa Timote; imimi lua mekekanan naþa mevitawe amiu sina e mñaki nini, nane amiu sumãare kiena ne Ntewa e pupia kumali nae Koren amio mña li na lelagaena taþena lala naþa asutetai asike e pupia lepas naþa Kris.

Ntewa kiena nasinenanena, naga pisirlua inu Pol vena neim sane nalologena tai kiena ne Yesu Kristo, kila narui kiau suri moki naþa nevisawal van amiu e mñaki nini, ana sumon nanene,

² nevisa sanini nevisave kiau leniena nesape yoko Ntewa Arimata amio Suþe Yesu Kristo aligan lemamiena a sumãarena, lalua asike e amiu punu ga.

Pol pisa potena pan Ntewa vanon kiena sinewoena

³ Sineun manene pañisi neyeluar kieta Ntewa nene naña naga pe Arimana kieta Suře Yesu Kristo, a naga pe Arimata nowo tai naña naga pe purpes nen ðelaga na sineyeena, a naga pe Ntewa nowo tai naña naga pulen ðelaga na kila luþeluþeena.

⁴ Pogos ya naña visae tewane pog mārera, Ntewa sumña kila luþeluþe ita ruru nenaga, ana kila tomārera ruru sina ga. Ana siraunia, tekilia tela ðelaga na kila luþeluþeena naña naga kila pan ita, tekila towe va kieta erau taþena lala naña apane ke kiela pogos mārera lala, teiila la sanene.

⁵ Pe lelaga pañisi sane pogos moki tesumña ga toþar ke naloge viowaena maran taaga sa naña Kristo þaria, ana naga kila naña tekilia towar mēna kiena kila luþeluþeena nowo lala.

⁶ Pogos naña mepane pog mārera lala, metañan ga narui, vena kila sane amiu akilia aloge wo a alual malena. A pogos naña mevisu sane Ntewa kila luþeluþe imimi, naga mēna ga po pañisi, komin naña kila sane imimi mēna ga mekilia mekilia luþeluþe amiu sina ga, a mekilia meiila amiu vena akila kiamiu sitomena ve piavi vena akilia awar ro e napiowaena la naña amiu mēna ga akilia alualia.

⁷ Mesitomiyu ya naña amiu aþarpoyo e þisi rui, kila sane e lepas na pun amiu, pe kiamimi sitomena kurkur re nenaga, sane yoko amiu na ve sanape. Nanene komin naña imimi mekilia ruru þisi rui sane pe sur korena naña amiu

monar avisu naloge viowaena maran taaga sa ke naña mepisuia, ana yokorena amiu akilia atol mēna ga pupia kila luḗeluḗeena kiena ne Ntewa ve sa ke ga naña imimi metolia.

⁸ Pona pe amloge kilia ruru re poli yo wa, e pupia pogos naloge viowaena lala naña mepisuia pogos naña mesuḿa memiyuḿae kar ke ga e pupia lepas nene naña Esia, ana nekilia nevisa nevisave piowa na piowa paḗisi. Sur la urmi manene la pan imimi, imimi pe metorokin la re si poli, pano pano-o mesitom mesape naga narui monar kiamimi luas nen malena narui.

⁹ Lelaga, memloge sa naña visae yerkawa na kumali tai visawal visave awe moḿar imimi memarmare, yoko mevisu sane sa ve sanene na wo laa sane, komin naña mepisu rui sane taḗatete si mekila sur tai, moḗsine imimi ḗele sina mesape yoko imimi moḿarera ve sanape. E pogos nene, memligan kiamimi malena sike ga e limana Ntewa, moḗsine ga naga komin naña naga taaga ga pe Ntewa naña kilia kila yaru naña mare imi ḿali sina.

¹⁰ A moḗsine naga sanene, mepisu naña pe lelaga paḗisi naña naga tamalia imimi, a nagane kiamimi sitomena ḿarera ruru po sane naga kilia tamalia imimi sina, pe yam taaga re ga poli, ana yoko naga suḿa kila lue ga silaga.

¹¹ A monar amiu aiila imimi naña asitoḿal imimi silaga e kiamiu leniena lala. Sa nene, pogos naña Ntewa loge kiamiu leniena moki nene, yokorena visa ruru imimi narui, tamalia imimi sina vetan pogos ḿarera la nene, a yoko

amiu ve moki avisa ga potena vaṽisi va naga vanon ya naṽa yoko naga kila van imimi.

Pol pisa meraravan ruru sur naṽa kila naga pe pimi mialiali la re si poli

¹² Moṽar naloge viowaena la sanene, ana sur tai suṽa naṽa kila imimi memloge pon imimi paṽisi. Nane sitomena tai naṽa teke e imimi naṽa pisa sanini, sape e lepas na kiamimi ṽelaga e maramiu, a e maran yeririna taṽena lala na yomarava nini, mekila sur make ga pe wa ruru nenaga, a kiamimi malena pe lelaga nena na po, sa naṽa Ntewa sinenania. Pe memiyuṽae re memio sitomena na yomerava nini poli, ana memiyuṽae ga memio lemamiena kiena ne Ntewa.

¹³ Sur make ga naṽa mesiriyuia e kiamimi ṽaki la nini, naga pe sur la naṽa mekilia mesape aulo woga, a mekilia mesape akilia aulo kilalea. Ana visae sur laṽas naṽa amiu akilia ga komṽasa, sineun nesape e legiena la ne pimi ke ne, yoko monar akilali naṽa akilia ruru make la ga.

¹⁴ Visae ve sa nene, pogos naṽa ita punu tesike lele taaga e legiena keviu nene naṽa Suṽe Yesu wasuṽe sina, ana yoko amiu akekaran imimi vaṽisi a imimi ṽena ga mekekaran amiu vaṽisi.

¹⁵ Ana komin naṽa nekilia ruru nesape sitomena wo na sanene sike likan ita rui, sineun manene nesape pogos naṽa neva e lepas nene Masitonia, yoko neiṽasun nomṽalivin amiu.

¹⁶ Lelaga, nesuũa nesitom ke nesape neiũasu nokom pun amiu yam ve lua, naũaesia e pogos nene naũa nesuũa nepa ke Masitonia, a yam ve lua nena e pogos naũa noũasuũa inu, naũa nesitom nesape amiu akilia aligan ruru inu e kiau mrapa vena nowasuũa si neva Sutea, ana peraga. Sineun nesape nekila wo van amiu sanene, ana sa naũa akilia rui, taũatete nekilia nekila.

¹⁷ Ana sineun nesape amiu monar akilia ruru sane pogos naũa nesitom ke nesape neimi pun amiu, naga sur tai naũa sineun manene paũaisi nesape nekila, naũa kiau sitomena mũareran paũaisi ve na kilaena. Naga pe pe sur re tai naũa kiau sitomena peve lua e poli, naũa nesitom ke nesape yoko nevano pona ve neva re. Peraga, inu na pe nesa re yeririna taũana la poli, naũa taũatete olelaga e kiela visena,

¹⁸ ana sa naũa amiu akilia awasine ga visena kiena ne Ntewa, akilia awasine mũena kiamimi visena. Kiamimi "Ore" pe kana kinas re naũa asape "Peraga" pona "Ana yo,"

¹⁹ ana pogos naũa mevisape "Ore," naga "Ore" ga. Monar meve lelaga sanene, vena meve maran taaga memio narina Ntewa, Yesu Kristo, naũa imimi telu Silvanus amio Timote mepimin memlologon pan amiu nanua rui. E pogos nene mepisawalia mesape kiena visena make ga pe lelaga silaga, komin kana "Ore" pe "Ore" nena napo,

²⁰ a navisaarena make ga naũa Ntewa pi-

sawalia e lepas kiena ne Yesu, pe tai re naña pimi sane pe navisokanena poli, ana punu ga pe lelaga. Sur ne nanene kila sane pogos naña tesuña temlen pa Ntewa, e kana nasiarena pitomi tol naña tepisape “Sanene,” tekila ga e kia kiena ne Yesu Kristo.

²¹ Kristo ke nanene narui naña memlologon pan amiu, a Ntewa ga pisirilua imimi pe na kilaen kiena yuññaena. A amio naga nene, Ntewa kila imimi memio amiu, ita punu ga tepim lele taagania.

²² Ntewa kiar ita tepe kiena, ana naga mligan Ninuna e losineta, sane navisaarena tai naña sape yoko temio naga e pogos la naña sumña pimi ke ne.

²³ Kieta Ntewa nene naga pe lelaga silaga, a naga kilia iila visena nene naña sineun nesape nevisawal van amiu. Sane nanua ne nepisa ñña nesape yoko noñalivin amiu gar Koren nene, ana siraunia pe nepiñas re si poli, a pona asitom piowagan inu e yo. Ana nesape nevisa van amiu naña pe vanon re kiau sur tai poli, ana vanon amiu ga, komin naña nekilia nesape visae neiñasu yoko monar nevis ñarera van amiu komin kiamiu ñelaga lañasia. Ana pe sineun re nesape yoko nekila amiu aloge viowa poli, nane kila sane pe nepim re si poli.

²⁴ Nepisa pan amiu sanene, awis monar ve asitom re avisave mesitom ke mesape mesike metavan amiu, vena meve ñarun kiamiu lela-gaena. Pe sa re nene poli, ana sinemimin mesape teyuñae ga lele taaga, vena kila amiu akilia aloge wo silaga, asuñalu ruru ñarera ase kiamiu

naviawaena.

2

¹ Sa naþa nepisa, nanua nepim sumo, sur laþasa suþa ga naþa monar nepis pan amiu panon narui, ana kila amiu amloge piowaganía. Ana nagane pe sineun re neim nekila amiu aloge viowa yam si tai poli, a sitomena ne nanene narui kila sane ve neiþasu nakaten amiu re sumo wa.

² Visae neiþasu nevis van amiu, nekila aloge viowa, yoko inu mēna ga neloge viowa, ana pogos naþa ita punu ga teloge viowa sanene, yoko taþatete si naþa tai kilia iila tai vena loge wo sina.

³ Sitomena ne naga nene naþa nepisa þesan e maki taþena naþa nemligan piþasu nanua rui. Sineun nesape akilali akila ruru sur viowa la nene sumo wa, vena kila sane visae pogos naþa neiþasu, yoko ve sur re si tai sike likan amiu naþa monar neloge viowaganía. Ana visae akila ruru kiamiu yuþaena wo, yoko nekilia neiþasu naþa nevisu naþa apim apo si rui, a visae ve sanene, yoko nekegara vaþisi, a yoko kiau kekarena nene kila kiamiu kekarena mēna ga ve keviu vaþisi.

⁴ Nepisa sanene komin naþa pogos na nesiri piþasu pan amiu nanua ne, nemloge piowagan manene laa. Nemloge sane losineu lavis worovia, a wamarau la suþa mlalau. Visena mārera la naþa nepisa pan amiu e maki nene, pe nekila re poli komin naþa sineun amiu mēna ga aloge viowa, ana sineun nekila amiu avisu kilale sane sineu sii manene amiu silaga.

⁵ Ana sa naña ita make ga tekilia, tai sike likan amiu naña naga kila pupia naloge viowaena nene. Sineun nesape sane sur viowa naña naga kila, kila inu nemloge piowa, ana pe in re ga poli, kila amiu mña ga moki liu amloge piowa. Ana pe sineun re si nevisave monar ala manene si nakoena van poli,

⁶ komin nekilia sane amiu punu ga apis pan p̃isi rui.

⁷ Apis pania toroki narui, ana nagane pe pogos naña aviewo naga, sinemiu ye si naga. Visae peraga, yoko naga loge viowagan manene sina vano vano-o viowa vania.

⁸ Ore, nom̃areran vena neviun van amiu ve sa nini, sane monar akila merarava ruru vania sane sinemiu si ke naga na wa.

⁹ In na nesiri m̃aki tañena nene nanua ne, sineun nevisuveve sane yoko amiu akekara naña alogear kiau visena lala naña sike loyum̃a ea, pona peraga.

¹⁰ Pogos naña nepisa nesape popon aviewo yar tai, nemlelaga nesape yoko akila, a naga naña aviewoia, in mña ga neviewoia. A nemninue ga, pona naga kila m̃a sur lañasia piowa pan inu yo, ana nekekaran naña nevisawal e marana Kristo nesape nepiewo naga, ana sanene, iila amiu mña ga vena akekaran aviewo yar tañena.

¹¹ Monar tevisuar ruruia, komin naña tekilia ruru sitomena viowa lala kiena yermare vena kila kare itaena, ana visae tesum̃a teviewiewo ita silaga, yoko naga tañatete nena taulu ita p̃isa.

Pol pisayu kiena mrapa navaen ma Troas amio

Masitonia

¹² Ana pogos naþa nepam re si pun amiu ma Koren poli, nepito ga nemlologon lologena wo kiena Kristo garo kumali naþa Troas, ana e yo nene, nepisu sane pulutava pietava ruru nena pan inu vena nekila yumãena kiena Suþe.

¹³ Ana sur viowa tai e pogos nene, nesitom ke nesape yoko nelual wolai naþa Taetas e yo nene, ana naga pe su re poli. Ana kiau sitomena nesitom manene naga paþisi, kila sane pe piavi re poli nemligan la nene, nemla si kiau mrapa yalen silau ma lepas nene Masitonia.

¹⁴ Kiau yalena pa sanene narui, ana potena paþisi pa Ntewa komin naþa silaga mligan Kristo naga sumã sumon ita. Nanua sumo ita tepe kiena nasinekar ga lala, ana naga taulu ita rui, ana tetaveve naga tepa kar ga e yo make ga, ana pogos naþa yar la apisu ita, yoko avisu kilale sane Kristo naga pe kieta Suþe. Pona nekilia nevisa sanini, sane ita na sane ponotaninu wo tai naþa asikapia, ponos miyere þar make yo, ana pogos naþa yar la amloponia, yoko alopon kilalea sane Kristo sumã pimi mñalivin la.

¹⁵ Ntewa kila ponotaninu nene pa vanua e yar make ga, pano tol la naþa asumã apanon ke mrapa natamaliaena, a pano tol la naþa apanon ke mrapa na kovioena.

¹⁶ Ana e la naþa apanon ke akovio, ponotaninu nene naga ponos piowa sane sur mare tai naþa kona, ana e la naþa asumã añal ke malena, naga sane ponos nen mãþes wo na tamaliaena.

Nanene narui ita tevisu yuũaena naũa mesuũa mekila naga pe pupia yuũaena paũaisi, komin memlologon visena kiena ne Ntewa naũa kilia kila yar tol malena pona tol marena.

¹⁷ Nalologena la ũaasa pe asitom manene re urmi e yuũaena nene poli, asuũa amlologon ke visena kiena ne Ntewa vena ataulu ga kilavaru ea, ana imimi na pe sa re nene poli. Ntewa pisir plan imimi ana memiyuũae ga e yo metava e marana, a mepian visena lelaga kiena Kristo pa yar taũaena lala, ũaarpoyo ga e ũaareraena naũa mla pan imimi.

3

Imimi na yar na kilaen yuũaena na viranarena viu

¹ Nepisayu kiamimi yuũaena keviu na metava ne, pe pon re asitom avisave nepis vilave ke sane navianena taũaena lala navisokanena. La nene apim pun amiu amio ũaaki la naũa apisayula asape la apo pa sanape, a pogos naũa amolue petan amiu, ũaareran asape monar amiu asiri si ũaaki laũaasia vena visawalen kiela yuũaena naũa aũaar ke pano. Ana visae sinemimin meva si e lele taũaena, pe mesitom re ũaaki tai ne sanene poli vena visawal imimiena.

² Visae yaru tai sinenan kilia visave imi sanape, popon imi visu ga mras nen kiamimi yuũaena e kiamiu malena lala. Amiu na sa ga ũaaki tai narui, naũa Kristo siria navisawalen kiamimi yuũaena. Yaru taũaena lala akilia aim auloia, vena akilia ya naũa mesiria e losinemi lala.

³ Yoko avisu amiu sane ape ñaki tai naña Kristo naga mligania, ana moñar pimi, a yoko avisu kilalea sane lelaga, mekila yuññaena e amiu po pañisi. Ana ñaki nene naga pe ñaki re naña wii na kilamemego na kapi naña asiri e ñas nen tus tai poli, ana naga ñaki naña Ninuna Ntewa siri e los nen yaru.

⁴ Visae ve sanene, kiau visena la nene pe visen vilave re poli, ana mekilia mevis sanene komin Kristo ga naga taaga kila naña moñasine Ntewa keviu pa ñisi.

⁵ Visae imimi ga, yoko tañatete mevisave imimi metorokin mekila sur tai, komin sur make ga naña mekila, Ntewa ga kila sane imimi mekilia mekila.

⁶ Naga ke narui mla ñareraena amio kiliaena pan imimi, kila imimi mepim mepe kiena yaru na yuññaena e lepas na viranarena viu naña naga kila amio ita yeririna lala na yomerava. Naviranarena ñesa asiri plan kana visena ne lala e tus lala navisaluaena lala kiena Mosis, ana visena la nene amiila ita ana pe torok ruru re poli. Apowo, ana ya naña akila, akila meraravan ga asape ita yaru nakilaroen navisaluaena, naña yoko monar telual marena vanonia. Ana naviranarena viu, naga visena ne lala apim añalivi e Ninuna Wa, a Ninuna nene narui kila ita tetol natamaliaena.

⁷ Mrapa marua nasumo nene, naña ate kana navisaluaena lala e kilavaru la naña pe lepalepas nene, naga suña pisaar ke ga kieta marena, ana naga pe sur tai naña pe wa pañisi. Pogos naña Mosis ñar lepalepas nen kilavaru la nene, naurarena kiena ne Ntewa pimi e naga, ana

pogos naña þar maran si kilavaru la nene pa le Israel lala, m̃areraena naurarena nene sum̃a pito ke tano rui, ana la apisu þele marana komin naña pilavila na pilavila.

⁸ Sanene, visae naurarena kiena ne Ntewa miyũmae m̃arera e pogos naña apisawal mrapa na tolen marena, yoko yum̃ae ve sanape e pogos naña yoko avisawal mrapa na tolen malena?

⁹ Yoko naurarena kiena ne Ntewa monar yum̃ae ve keviu va manene va þisi e pogos nene, a tesum̃a tepisu þisi rui naña kapi vivaga na mrapa viu sum̃a tego kar ga, sum̃a taulu kapi na mrapa marua nene naña sum̃a pito ke tano rui.

¹⁰ Lelaga, kapi viaga na mrapa marua nene naga sum̃a tego ruru nanua sumo, ana nagane, tepisu naña kana kapi nena sane pe tego ruru re si poli, komin kapi na mrapa viu pimi þarpoyo, sum̃a tego keviu e yo make ga.

¹¹ Kapi naña sum̃a pito ke tano nene, lelaga naña naga pitomi þesa, pitomi amio kana pupia naurarena nena. Ana nagane kapi viu naña naga pimi mare ga sirau, yoko naga sulue na sike ne, a kana naurarena nena yoko ve keviu manene lue.

¹² Visae tesitomyuli nene, yoko kila kieta sitomena m̃arera rurua, a ve temaraun re si naña tekila kapi vivaga kiena Suþe tegoli yo kar lala.

¹³ Ana tesitomyuli m̃ena yermarua Mosis, naña naga pa metava e tavie, ana Ntewa pimi lavisinia, kila marana pilavila paþisi. Ana pe pon re ita teve sa naga poli, komin pogos naña þasuþe si pitomi pu le Israel lala naga kalo marana e

kulmrae vena ve avisu re, vano-o tol pogos naña kana tegoena sumã vito m̃a tano vano p̃isi.

¹⁴ E pogos nene, pe apisuli re kapi nene poli wa, komin naña p̃arila m̃arera pañisi, ana tepisu naña pimi tol nagane, la sa m̃a ke nene na wa. Apulo ke visena lala e tus marua naña sike ne, ana sane kulmrae na sike ga wa, sumã kilawo ke kiela sitomena lala. Ana visae alelaga ga e Kristo yoko naga kilia tarlua kulmrae nene vena akilia avisu kilale kiena yomerarava viu.

¹⁵ Pogos naña apulo ke navisaluaena kiena Mosis, naga sa naña sur tai kalo ke p̃arila,

¹⁶ ana pogos naña visae yaru tai imi e Kristo, a warlua sur nene naña kilawo ke kiena sitomena, ana naga kilia visu kilale suria. Sa ga visena na Nasiriena Wa naña pisayu yermarua Mosis nene, naña pisape “Pogos naña Mosis pilon naga, kira pisu Suñe, kulmrae nene mloru si petania.”

¹⁷ Ana pogos naña visena nene sape Mosis pilon naga kira pisu Suñe, visena naña Suñe, kana kinasia naga naña pe Ninuna Wa kiena ne Ntewa. A tekilia tesape e nape naña Ninuna Wa kiena ne Ntewa sike ea, yaru lala akilia aurmatan m̃areraena na viowaena, alual malena.

¹⁸ Sanene, ita make ga naña temlelaga rui, pe kulmrae tai towo re si marata poli, ana tesumã tepisu ruru nena pupia nauraraena kiena ne Ntewa. A pogos naña tesumã tepisu m̃a pano, nauraraena nene pimi puleule e ita, pano tol naña tepim tepe sane kupito vena tegoliaena kiena kapi vivaga va va yeririna tañena lala. Ana kapi vivaga nene pe molue re kome kieta malena

poli, molue kome kieta Suře, nađa naga Ninuna nanene nađa sike e ita.

4

Pol amio nalologena lala amlologon kapi vivaga nalologena wo

¹ Mesuđa mekila ke kapi vivaga kiena ne Ntewa pilavila ke sanene, naga pe kiamimi pupia yuđaena tai vena iilaena yaru tađeana lala. Losinena Ntewa pulen sineyeena, a naga ke narui nađa mla yuđaena nene pan imimi, a pogos nađa mesitođal nene, kila sane pe sinemimi maren re yuđaenen pogos tai poli.

² A pogos nađa memiyuđae, mesuđa memiyuđae ruru po silaga. Yaru lađeasa, amiyuđae vinau e ga e nakilakotaliaena lala pona akilali nađa awere sitomena kiena yaru lala, a akilia avilovilon mđena visena kiena ne Ntewa va ve tađeana, a imimi na pe mekila re đelaga la sanene poli. Mekilia mesape pogos nađa mesuđa memiyuđae, mekila ke ga e marana Ntewa, a monar meyuđae wo. Yeririna tađeana mđena lala asuđa ađeaveve ke kiamimi yuđaena a asuđa amloge ke ponia, komin nađa asuđa apisu kilale asape mesuđa mepisawal make visena lelaga kiena ne Ntewa lala mesmes ga.

³ Memlologo sanene, pe yaru re tai nađa kilia visave naga pe mloge kilale re lologena wo poli, nađa mesuđa mepisawalia. Ana visae yaru tai visave pe merarava re pan poli, naga pe yar re tai nađa suđa mialin ke yomerarava poli,

ana monar ve yar tai naña suña mialin ke ga yemalolo, naña monar sur tai kilawo ke kiena sitomena, sane kulmrae naña tepisayu rui.

⁴ E lepas kiena ne la naña pe amlelaga re poli wa, suñe viowa na yomerava nini naga kilawo kiela sitomena rui, naga kila la sane ape kilamara kata, komin naña naga yepen mavin sape avisu pupia kapi vivaga na lologena wo kiena Kristo. Kristo nene, kiena naurarena tego pañisi, komin naña naga ãarnena marana Ntewa lelaga.

⁵ Mesuña memlologon ke nene narui, nane Yesu Kristo, kieta Suñe. Pe mesuña mepisiri plan imimi re sina pan amiu poli, ana mepe kiamiu yar na yuñae ga lala vena lologonen Kristo van amiu vena akilia naga.

⁶ A sur make ga la nene naga pe yuñae kiena ne Ntewa ga. E nasiiena, Ntewa pisa sanini, sape “Yoko kapi imi tegoli yemalolo naña ñeke ne,” a suña kila ke sanene pan ita na wa. Ntewa ke ga nanene narui naña suña miyuñae ke nagane, kila kiena kapi vivaga tegoli losineta lala, kila tetol kapi nene naña suña tego molue kome marana Kristo, naña molue nena e naurarena kiena ne Ntewa naña sike ea.

⁷ Nakiliaena lala na naurarena kiena ne Ntewa sike e ita sanene, naga pe sur wo tai naña pe wa pañisi. E imimi naña memiyuñae ke yuñae kiena kieta Suñe, mepisu sane imimi na sa ga sur korena ga, a pe metorokin re naña kiena nawaena la naña powo nene ase e imimi, ana Ntewa naga po, suña kokonia ke e kiamimi malena la silaga. A nanene kila sane visae pogos

tai meyuũaen sur wo la ƣasia, ana yoko mevisu kilale ga sane pupia m̃areraena na kilaen sur la nene pe pe m̃areraena na yomarava re tai nene poli naƣa ƣar po yo kome imimi, ana naga m̃areraena tai nae ma e peni naƣa kom ga e Ntewa pitomi.

⁸ Nagane memiyuũae ke memio m̃areraena nene naga miila imimi keviu, komin naƣa mepane ke pog m̃arera la moki, ana pe memloru re poli wa. Sur la moki naƣa akila imimi mesitom ƣele paƣisi, ana kiamimi sitomena la pe kovio re poli.

⁹ Yaru la moki naƣa akila kare imimi pano paƣisi, ana silaga Ntewa pisuar ruru imimi. Moƣar magka lala, ana taƣatete awe plan imimi, memal ke na wa.

¹⁰ Lelaga, pogos m̃arera pan imimi sanene narui, pano pano naloge viowaena na marena sike e yepemimi sa naƣa Yesu ƣaria e kiena marena. Ana metam̃an ga, komin naƣa visae marena kiena Yesu sike e imimi, yoko kiena malena m̃ena ga sike e imimi.

¹¹ Memiyuũae kiena Yesu sanene, kila sane pogos naƣa memal mesike e yomerava nini, ana silaga mesike ga lavisin marena, ana nanene kila m̃ena ga sane amiu akilia avisu kilale sane malena kiena Yesu sum̃a m̃al̃ñalivi ke keviu e yepemimi na marena ga lala.

¹² Lelaga naƣa mesuũa mepanon ke kiamimi marena, ana mekila sanene vena amiu akilia avano alual kiamiu malena.

¹³ Visena tai sike e Tus na Yauena Wa lala, naƣa yaru tai pisi pisape “In na nemlelaga rui, nane

kila narui nekilia nevisawal visena,” a mepisu sane ninuna na viawaena naña sike e yaru nene, nagane keviu mēna ga e imimi. Mesa ke ga naga, naña imimi mēna ga memlelaga, a sur ya naña memlelaga e naga, nanene mepisu sane mekilia mevisawalia.

¹⁴ A pe memaraun re nena visawalen poli, komin naña mekilia ruru sane kieta Ntewa naña naga kila kieta Suḻe Yesu mali sina e marena, yoko naga kila imimi mēna memali sa ke ga Yesu, a yoko naga kila amiu mēna amal sina sane imimi, ana yoko were ita punu ga teva tesike temio naga.

¹⁵ Lelaga, mepa moḻarpoyo e pogos mārera la moki sanene, ana pogaga, komin naga kiamimi mrapa ke ga tai nanene narui naña mekilia miila amiunia. Sanene sinemimin ga lemamiena kiena ne Ntewa monar momolue silaga va yar kar ga lala e yo punu ga, vena kila sane ayeluar Ntewa silaga, asumña avisa potena vania vano vano-o vena kila kiena naurarena imi lapa ve keviu.

¹⁶ Sitomena wo la nene kila sane pe sur korena ga naña viowa van imimi ve sanape, ana mesumalu moḻarera ruru mesumña ga. E lepas na yepemimi lala, pimi pe yermarua, sumña pimi pororovia, ana e lepas na ninumimi lala, Ntewa sumña kila pimi pe urviu, mārera ruru lue ga e legiena make ga.

¹⁷ Narin pog mārera lala e yomarava nini, la ape na yam plas ga, ana asumña akila ita tesururuia vena teva toḻaliyi tese e naurarena nae peni, naña keviu paḻisi, po pano-o po manene laa, naña teloge ke wonia vano vano ve

uro re.

¹⁸ Nagane ve kieta sitomena la ve su re e sur la naña kilamarata visuia, ana kieta sitomena la sike e sur la naña kilamarata pisu ãele ga, komin naña sur la naña kilamarata kilia visuia, la ape na yam plas ga e yomarava nini, ana sur la naña kilamarata pisu ãele ga, la ape na sulueena ma e peni.

5

Leleta ma e peni

¹ Tekilia rui tesape tasneta na yomarava nini taãatete sulue. Naga sane narin silparpara tai naña tesuvia, naña yoko pogos tai monar mawowo make ga, pona yar taãena lala aimi aweplania. Ana tekilia mēna tesape pupia mēta yumā mārera tai mēke ga wa, naña pe amiyumāen re e yomarava nini poli, ana Ntewa ga kila ruru monmāte ita ke ma e peni ana siraunia tekilia teva tesu ea.

² Yomarava nini naga sa ga lele na tagiena ga, a tekekaran ga naña tourmatania, sinetan teva tetapolou e mēta yumā ma metava,

³ a pogos naña teva tesike ea, yoko ve teloge re si sane pe mēta unā re poli, ana tevisu ga na wa sane kieta yo nena napo nane sumā ne.

⁴ Lelaga, tasneta naga sa ga silparpara tai naña tesuvia e yomarava nini, ana lelaga naña, pogos naña tesike e sanene tesumā takar malueta silaga komin naloge viowaena lala na pog mārera la naña tesumā toãarwowo ke yo ea. Pona pe pon re aimin awe kare tasneta poli,

ana sitomena tai monar suũa ga e ita sane visae akila, pogaga, komin naũa popon sane toure matan silparpara nini, teva tese yuũa wo tai sumo wa. Monar tevisu kilale ruruia sane popon sa tas nen marena nene ẽisi, ana yoko tas viu tai kilia imi kus lelana.

⁵ Nakonua rui, Ntewa suũa miyuũae ke e ita vena kila ruru ita teva e kiena yo sanene narui. Naga mligan Ninuna sike e ita vena kila ita tesitomãl silaga sane kiena visaarena na kilaen van ita sanene yoko imi ve lelaga.

⁶ Tesuũa tesitomãl ke nanene, kila sane silaga toũarera. Tekilia tesape nagane, tesuũa tekila ke mũata uũa e silparpara nene, naũa tasneta, ana pe tesu re e mũata uũa wo temio Suũa ma metava poli wa.

⁷ Sanene, pogos naũa tesike e yomarava nini wa, monar ve tekilali re naũa tesuũalu e ya naũa kilamarata ga kilia visuia, ana monar tesuũalu mũarera e naviawaena.

⁸ A e lepas na pun imimi, momũarera ruru ke ga wa vena suen e yomarava nini vena mesuũa mekila kiena yuũaena, ana mepisu sane po mũana ga visae mekilia meligan tasnemimi la na yomerava nini, meva mesu nena e mũamimi uũa memio Suũa.

⁹ Sanene, visae tesike e yomarava nini, pona tesike ma metava, ana silaga monar tekilali ya naũa yoko naga kekarania.

¹⁰ Monar tesitom sane pogos naũa Kristo pa totano metava e kiena yo wa na liũpereena, yoko ita make ga veve taaga teva tesuũalu tese

marana. Ana e pogos nene, yoko naga ga kila sane wo van ita, pona viowa van ita, taveve ga ya naña tesuña tekila e pogos naña tesike e tasneta e yomarava nini.

Kristo kila ruru marata temio Ntewa

¹¹ Pogos naña mesitoñal naña yoko Kristo liþere yaru lala, memarau, a mepisu sane popon meyuñae ñarera vena metaulu yar lala vena ve akovio re. Ntewa pisu kilale ruru þelaga na kiamimi yuñae na la nene, a nesitom sane amiu ñena apisu kilale sane memiyuñae sa ga naña naga kekarania.

¹² Nesuña nepisa ke sur la nene, pe nekila re poli komin naña sineun vena amiu avisirlua imimi sina, ana popon vena akilia akekara e ya naña mesuña mepisa. Visae atol ruru kiamimi visena lala, yoko kila sane visena la nene kilia se amiu, ana yoko akilia avisatamñe la naña asitom ke asape apo rui. Ana la nene akila la ke apa metava komin ga ya ne akila ke e maran yaru lala, ana pe asitom re ya naña sike loyuña e kiela malena poli.

¹³ Nekilia nesape pogos naña nepisa visena la nene, yoko la þas naña asike amio amiu monar avisave nepe wowe, ana na nene na poga ga. Visae lelaga naña mepe wowe, mepe wowe komin naña mekila manene laa yuñae na kiena ne Ntewa, ana visae þarimimi la woga ga suña ga, þarimimi la po komin naña mesitoñal amiu, ana monar ayagagon imimi.

¹⁴ Sur taaga ga naña suña kawe ruru ke kiamimi malena vena mekila ruru yuñae na wo

la kiena Kristo, nane kiena sinesiena. Memlelaga m̃arera mesape kiena marena naga taaga tamalia kieta malena ita make ga, visae peraga, yoko ita punu ga monar temare ga, yoko taṓatete ita yaru tai kilia mali.

¹⁵ A naga mare wo ita punu ga sanene, naga sinenan sape ita la naṓa temlelaga ea pona temal ke e yomerava nini wa, ve teyum̃ae kieta re ga, ana teyum̃ae kiena, naṓa naga mare vena tamalia kieta malena, siraunia Ntewa pisirlua si naga.

¹⁶ Sanene, popon ve tevisuveve re si yaru lala taveve sitomena na yomarava nini. Nanua, pog naṓa Kristo sike e yomarava nini, yaru la apisuvevea taveve sitomena na yomerava nini, ana nagane pe tepisu re si naga sanene poli, a pe pon re tevisuveve yaru taṓena lala taveve m̃ena sitomena na yomerava nini poli.

¹⁷ Na nene na komin naṓa visae yaru a naṓa mlelaga e Kristo, naga pimi sane pe yaru viu ruru nena ga. Kiena malena marua na sumo kovio nena ga, ana nagane kiena malena viu pimi m̃alivi rui.

¹⁸ Ntewa ga kila sane tekilia tevilopu kieta malena sanene, komin naṓa naga ke narui mligan Kristo pitomi e yomerava ve na kilaen kieta mrapa towasuṓe si teimi puna, a sinenan sape monar toure yar taṓena lala la m̃ena ga awasuṓe si aimi puna.

¹⁹ Visae ve sanene, Ntewa miyum̃ae ṓarpoyo e Kristo vena wereen yar na yomerava lala awasuṓe sina vena aim ave taaga sina amio, naṓa naga pe sitom re si sape la nakoena van

la vanon kiela mlamulena viowa la poli. A amio m̃ena nene, naga sinenan sape ligan kiena visena lala e limata, vena tela va va yar taṓena lala vena la m̃ena ga awasuṓe si aim puna.

²⁰ Sur ne nanene narui kila sane mepim mepe yaru kiena ne Kristo vena waren visena kiena ne Ntewa vano. Sanene, pogos naṓa mepisawal visena pan amiu, sa ga naṓa Ntewa ga sum̃a pis, ana sinemimin paṓisi mesape meviun manenea van amiu punu ga mesape awis, e kia kiena ne Kristo, monar awasuṓe amiu aim puna Ntewa.

²¹ Naga ke narui sinena miye ita, ana mligan narina nene Kristo, naṓa naga pe kilali re mlamulena viowa poli, kila naga pimi sane yaru na waren kieta mlamulena viowa ita make ga. Ntewa kila sanene vania vena kila sane ita yar na kilaen mlamulena viowa, tekilia teim teve yaru mesmesu lala e marana ne Ntewa.

6

Malena m̃arera kiena yaru na yum̃aena kiena ne Ntewa

¹ Mesum̃a memiyum̃ae ke sane yar lala na yum̃aena lele taaga memio Ntewa, a mekilia sanape naṓa naga pe lemam paṓisi pan ita make ga. Sanene, mesape meviun manene van amiu, sane kiena lemamiena wo naṓa pimi e amiu, pe pon re imi korena ga poli. Monar alavia, a monar ataṓania kila kiena yum̃aena e kiamiu malena.

² Visena tai teke e Tus Marua pisa sanene rui, naṓa Ntewa sape,
“Mesmesun pogos naṓa po pan amiu, neyagogon kiamiu tagena,

a mesmesun legiena natamaliaena, neim neiila amiu.” *Ais 49:8*

Ana e kiamimi navisuena, mekilia mevisawal mevisave nagane narui pe kiamiu pog mesmes narui, nagane narui pe legiena na natamalia amiuena.

³ E lepas na kiamimi yuñæna, mesuñæ moñikeyon naña mekila wo lue ga, vena ve mekilawo re mrapan yaru kar ga naña sinenan sape imi. Pe sinemimin re naña yar lañasa asape mekila sur tai piowa, pona mekila pal yuñæna koyo tai.

⁴ Mesuñæ mekila ke sur make ga vena kologia sane mekila ke yuñæna mesmesu sane yar wo lala na yuñæna kiena ne Ntewa, ana mesuñæ metañan imimi vena mevane sur ve moki. Mesuñæ makawean imimi vena meva mowarpoyon luas nen yuñæna lala, pe suri korena naña mepane sur viowa lala, pog mñarera lala, a sur nailanen viowa lala.

⁵ Asumãlu akawe imimi, a añe imimi, a akoven imimi e yuñæ nakoæna. Pogos moki, memiyuñæ na memiyuñæ, pe momomalio ruru re poli, a kamimi kinanena pe po re poli.

⁶ Piowa manene laa pan imimi sanene, ana mesuñæ ga memiyuñæ mesmes ga, a mesuñæ memiyuñæ memio kiliaena, a sitomena viavi, a sinewoena. Yeririna la apisu naña kiamimi malena pulen Ninuna Wa, a kiamimi ðelaga pulen sinesiena naña lelaga,

⁷ naña mepisawal visena la naña pe apisokan re poli, naña memiyuñæ e mñareraena kiena

ne Ntewa, a naña e limamimi lala, e lepas na ãamarua a e lepas na ãamñeli, mopuarar sur na mara lala vena kilaen mesmesuena taulu naviowaena.

⁸ Yeririna la ãasa apisir plan imimi, a laãasa amligan imimi mesike laa tano, laãasa apisa ruru imimi, laãasa apisa kare imimi pañisi, ana pe mesitom re poli, mekila ga. Pe mepisa kotalia re yar tai poli, ana asumña apisu imimi sane pe mepe lelaga re nenaga.

⁹ Akilia ruru imimi ãisi rui, ana asumña akila ke sa naña pe sinelan re akilia imimi poli. Memal ruru mesumña ga, ana asumña sinelan asape visae memare ga rui.

Nane sumña pa sanene pan imimi narui, ana pe sur korena naña moñar ke nakoena lala, la taãatete akilalua kiamimi malena na wa.

¹⁰ Pe sur korena ga naña naloge viowaena la moki pañisi, ana sinemimi la kekara silaga. Pe sur korena naña limamimi korena ga silaga, ana mesumña mekila ke yar tañena la añar ke sur moki. Ana pe sur korena naña pe kiamimi sur re la poli, ana mepisu naña sur make ga pe kiamimi ga.

¹¹ Erau nae Koren lala, pe kiamimi sitomen viowa re tai e amiu poli, naña mekilawania pan amiu sumña ga. Mepisawal sur make ga pan amiu rui, a sinemimi sii amiu pañisi.

¹² Pe mekila re suri tai naña pona kilawo kieta erau wo poli, ana visae kilawo e lele tai, nanene komin naña amiu ga apuarar sitomena viowa laãasa e imimi sumña ga.

13 Ana visae ve sanene, monar nevis van amiu sa ga naruu la narui, nesape awis, ve akilawan re si kiamiu sitomena laṽasia, ana monar akilali losinemiu vike van imimi.

Avisuar ruru e la naṽa pe amlelaga re poli

14 Sineun nevisa van amiu nesape ve asumña akilali re naṽa aimi ave taaga amio la naṽa pe amlelaga re poli. Popon asitoṽalia sane ṽelaga na mesmesu amio ṽelaga na mlamulena viowa, lalua taṽatete aviran la aim lele taaga, a legiena pe erau ṽele ga amio yemalolo.

15 Kristo kiena sitomena ve taaga ṽele ga amio Yermare, a yaru naṽa mlelaga pe kiena sur re tai poli teke amio yaru naṽa pe mlelaga re poli.

16 Nono na visokanen lala asu ṽele loyumña e yumña wa ṽana Ntewa pogos tai, a visena nene kana kinasa komin yumña wa ṽana Ntewa, naga pe yumña re ga tai poli, ana ita li na lelagaena kiena ne Ntewa naṽa mali. Naga nene taveve ga kiena visena laṽasa, naṽa pisa sanini, sape
“Inu yoko nesike e la, yoko neyaloro likan la.

Inu yoko neve kiela Ntewa, yoko aimi ave kiau lus nena lala.

Lev 26:12

17 *Ve sanene, sane kiela Suṽe, nepisa pan kiau la nene nesape monar amolue vetan taṽena lala, monar aviaṽa vetan yar viowa lala.*

Monar aim ave wa nenaga, a monar ve atol re kororaki lala, sanene yoko nekilia noworworun la aim asike amio inu.

18 *Yoko inu, sane Ntewa na mava, nekilia nevisa van la nevisave*

'Amiu aim vena neve Arimamiu, a vena amiu ave naruu nena lala.' "

7

¹ Erau lala, nanene navisaarena wo lala kiena ne Ntewa naña pisape yoko naga were ita sane kiena namratava lala. Naga kila sanene pan ita po pañisi, ana popon monar tevtanon naga silaga, naña monar towe plan make kororaki e kieta malena lala. Mlamulena viowa lañasa tekila e tasneta, a lañasa tekila ga loyuma e losineta, ana monar toñisin la make ga, monar tevim naña teve wa naña teve wa sa naña naga sinenania.

Pol kekaran pañisi naña Ntewa miyuma e la

² Sineun nesape neviun si tan amiu nesape ve sinemiu kar imimi re, ana aligan ruru lelemimi tai e sinemiu lala, vena nekilia nevisa re si sur lañasa van amiu sumo wa. Popon akila sanene, komin naña pe amiu re tai poli naña mekila piowa pania, pona mekila karea, pona mekila kotalia e sur lañasa.

³ Ana pogos naña nepisa visena la nene, pona asitom ke asape nesitom ke piowa e amiu, pona nesape nevisa kare amiu, ana pe sa re nena nene poli pisa. Peraga, sa ga naña nepisa rui, nesape amiu na asike e losinemimi rui, a tesuma tepim tepe taaga pano pano tol naña sanena naña tesike ga e malena taaga, pona visae ita tai vane marena, yoko teloge sane ita make ga temare.

⁴ Lelaga nekilia nevisa sanini nevisave in na noñasine amiu keviu na keviu, noñarwar inun

amiu pa p̄isi, a pogos naṗa nesitoṃal kiamiu yum̄aena wo lala, sum̄a miila ke kiau sitomena keviu pa p̄isi. Lelaga naṗa nepane sur viowa moki, ana asuṃa akila pan inu naṗa naloge-woena a kekarena sum̄a pule manene paṗisi e losineu.

⁵ Nepisa sanini komin sanene narui nanua sumo ne, pogos naṗa mepa moṃalivi e lepas naṗa Masitonia. E yo nene, moṗar ke si veveyuena m̄arera lala, kila sa naṗa memarau towe m̄aga, a tasnemimi pe pulmas re tai naṗa va ruru e poli.

⁶ Ana kieta Ntewa naga pe Ntewa na kila luṗeluṗeen sitomena kiena yaru lala naṗa amloge piowa, ana naga sitoṃal imimi, kila kiamimi erau wo naṗa Taetas pimi m̄alivin imimi, a pogos naṗa mepisu si naga memloge po paṗisi.

⁷ A pogos naṗa sun pa imimi, naga pisawal sur wo la naṗa amiu akila, miilaar imimi keviu paṗisi. Naga pisayu sanape naṗa naga m̄ena ga, pogos naṗa naga pimi m̄alivi pun amiu, naga m̄al sur mok liu e amiu naṗa miila naga, a pisawal sape akila mara wo e kiamiu visena la nanua ne, naṗa nagane apilopu kiamiu sitomena, asuṃalu asike e kiau lepasa. Pisawal sape sinemiun manene laa paṗisi naṗa neiṃasu neyaliali amiu, a suwala, pogos naṗa nemloge nene nemloge po na nemloge po!

⁸ Pogos naṗa nesiri m̄aki taṗena nene pimi pan amiu, nemligan pae pano ana pe piavi re poli nesitomiyu sina, nesape visae ve neligan re ga rui. Nanene komin naṗa nekilia nesape kiau

visena m̃arera lala yoko monar kila amiu aloge viowagan towe m̃aga. A poglis naṓa memloge navisawalena kiena Taetas, nepisu sane lelaga ga na wa, kiau m̃aki kila kare kiamiu sitomena p̃isa. Ana nanene na yam plas ga, siraunia avilopu amiu sina, ana kila sane nekekaran sina naṓa nemligan m̃aki nene pim̃asu.

⁹ Sane pe nepisa re nesape nekekaran naṓa m̃aki nene kila amiu amloge piowa poli, ana nekekaran ga naṓa naloge viowaena nene kila apilon amiu. A kiamiu naloge viowaena nena, pe imimi re naṓa mekila pimi m̃alivin amiu poli, ana Ntewa narui naga kila pimi m̃alivi.

¹⁰ Sanene, naloge viowaena nene naga naloge viowaena wo tai naṓa pitomi ma e peni, naṓa kila yaru vilonia vena tol natamaliaena. Ana naloge viowaena taṓena, naga naloge viowaena na yomerava nini, naṓa naloge viowaena viowa tai naṓa yoko kila yaru loge viowagan m̃a vano vano va tol marena.

¹¹ Amiu m̃ena akilia avisu kilale sane naloge viowaena naṓa Ntewa taṓan pimi pan amiu, naga kila yum̃aena wo tai paṓisi. Kila sane asitom urmi manenea e kiamiu malena, aṓareran ke paṓisi vena kiamiu kia imi wo sina. Sumo na, sinemiu mimin naṓa apisayu napiowaena naṓa sike likan amiu, ana pogos naṓa nepis pan amiu vanonia, apisu kilale ga mrapa na wa, ana amarau. Amiu ga asum̃alu apisi ke sina ga pan amiu, a amla nakoena pan la naṓa akila piowa, vena ve naviowaena tai su re si pun amiu.

¹² Sineun nesape nevisa m̃aki nasumo, nemli-

gania komin naña nepisape nevis va lalua nene naña akila piowa, a sineu miye mēna yermarua nene naña lalua akila kare manene laa naga. Nemligan mēna ga komin naña sineun nesape monar avisu kilale sane lelaga, sinemiu si imimi, ana pogos naña mevis van amiu e kia kiena ne Ntewa, amiu akekaran naña avatanon ya naña mevisa.

¹³ Ana poglis naña Taetas pimi pisawal pan imimi sape amiu akila sanene rui, kilalua kiamimi sitomena pa metava pañisi.

Mekekaran manene laa nene rui, ana pogos naña Taetas pisayu sina pan imimi, pisayu sa naña amiu akila manene po pania, mekekaran pa laa sane. Naga pisa ke naña sike amio amiu, amiila naga a apisirlua kiena sitomena, a akila si naga kekara pa ñisi.

¹⁴ Nepisayu amiu pania nanua sumo rui, nesape nekekaran kiamiu ñelaga wo la pa ñisi, ana pogos naña piñasu mñalivin amiu, ana pisu ga na wa sane pe nepisokan re poli, nepisa ga lelaga. Sa ke ga nanua sumo, nepisa ke ga sur lelaga la pan amiu silaga, ana nagane, akila kiau visena naña pa Taetas e kiamiu lepasa pimi pe lelaga ruru mēna ga.

¹⁵ Naga tañatete sinen ñesan pogos naña piñasu, amiu amarau pañisi a sinemiu kurkur, ana poglis naña pis pan amiu, amlogearia, apatanon ruru nena kiena visena. Kiamiu ñelaga wo na sanene, kila sane pogos naga ñasupe sina, sitoñal amiu lue ga silaga.

¹⁶ A e kiau lepasa, nepisa ga nesape nekekara naña nekekara, a nagane nepisu sane nekilia

nowasine ruru amiu e sur make ga e pogos make ga.

8

Popon ala nalaena

¹ Erau nae Koren lala, sinemimin mesape amiu aloge lologena na sur wo tai naþa suþña þarwowo ke yo e suþñare lala na pupia lepas naþa Masitonia, naþa Ntewa miyuþñaen ke e kiena lemamiena.

² E yo nene, apa aþarpo yo e pog mñarera lala naþa sur moki liu kilali kare la, a pano tol naþa pe kiela sur re si poli, ana la nene, pe aþis re nena e kekarena ga e ya naþa la apisuia. Limala korena ga, ana memilan paþisi sane pogos naþa amloge asape nalelagaena taþena la gar Yerusalem apane mña pog mñarera, sinela miye la ana sane limala pimi pule ruruia amio sur lala vena laen vano sane kiela nalaena van li taþena la nene.

³ Pe yar re tai poli naþa pisape monar akila ve sanene, ana la ga asape akila, a nekilia ruru sane amla sur make ga naþa akilia alavia, vano tol naþa laþasa amlavia taulu ya naþa akilia alavia.

⁴ A pogos naþa aþar viraran punu pae rui, amligan e limamimi, amñareran asape melual mrapa tai vena liganen nalaena nini vano, komin naþa asape visae akilia alual si pulmas naiilaena na lelagaena wa taþena la sanene, yoko ve sur wo manene laa tai van la, naþa yoko akekaran vaþisi.

⁵ La apo paŝisi, komin nanua sumo atamian make kiela malena sane kiela nalaena tai pa Suŝe, a amligan la asike vatanon kiamimi visena, ana siraunia amla ya naŝa la kiela sane nalaena tai pimi pan li na lelagaena taŝena lala. Akila po taulu manene ya naŝa mesitom mesape yoko akila, ana lelaga, akila mesmesun ga e nasinenanena kiena ne Ntewa.

⁶ Ana pogos naŝa mepisu le Masitonia taŝena lala akila sanene, mesitom mesape popon meligan si Taetas inas pun amiu, vena iilar amiu vena akila mena ve sa nene. Mekilia mesape pogos naŝa naga piŝasu sumo, naga suŝa pis pan amiu ana amiu asiar kilaen yuŝaena wo na sinewo nene rui, ana popon naga imi kila make ruru nena ga amio amiu.

⁷ Mepisu naŝa yuŝaena taŝena lala, asuŝa akila ke po rui, naŝa kiamiu viawaena keviu paŝisi, apisawal ke visena lelaga po paŝisi, akilia sur moki rui, asuŝa yepemiu men ruru yuŝaena, a asuŝa sinemiu sii imimi li nalelagaena taŝena lala keviu paŝisi. Akila yuŝaena la nene pano taulu ya naŝa mesitom mesape atorokin akila, ana popon akila mena ve sa ke ga e lepas na yuŝaena nakianen nalaena nene.

⁸ Nepisa sanene, ana visena nene naga pe sa re navisaluaena tai naŝa yoko monar atavevea. Sur nene sike ga e amiu, ana nesitom nesape popon sa nevisayu taŝena laŝasa ve sanene, nepisawal sur wo la naŝa akila ke rui. A pogos naŝa yoko aloge, yoko kila amiu avisuveve amiu towe li laa mŝaga sane, sane kiamiu sinesiena keviu mŝaga yo, maran taaga sa ke kiena la nene pona peraga?

⁹ A popon tesitomãal lemamienna kiena kieta Suþe Yesu Kristo ve keviu silaga, naþa sumo, naga sa naþa kiena sur make ga, ana naga sitom ita e yomarava, naga pitomi sa naþa pe kiena sur re tai poli, vena kila sane tekilia teim teve yar na sur moki.

¹⁰ Pogaga, nanene kiau sitomena tai nene e lepas nene. Nepisa ga nesape nepisu sane sur nene sinemiun asape akila e kas nanua rui, a nane asiar asape akila ne, ana popon manene laa naþa asumãalun sina vena akila make ruruia.

¹¹ Kiamiu sitomena nakilaen sanene naga m̃arera ruruia nanua þa rui, a nagane popon am̃areran ruru nakilaena, a vena akila va am̃a pe naþa atorokin akila.

¹² Ntewa pe pisa re pisape monar tela nalaena taulu ya naþa teke e limata vena tekiania, ana naga sinenan ga sape tekekaran iilaen yaru taþena, a tela nalaena torokin ya naþa tekilia telavia.

¹³ Ana poglis naþa nepiun tan amiu vena akekarãan iilaena sanene, pe nesitom re nesape nekila sane yoko yuãaena urmi van amiu poli, ana imi melala ga van li taþena lala.

¹⁴ Nesuãa nesitom ke ga sane popon ita make ga teve maran taaga ga. E pogos nene, kiamiu sur mok liu, ana lala na peraga, pe kiela re poli, ana popon kiamiu sur komþasia vano ve kiela, vena kiela sur m̃a tai ve tokak ga. A pona yam laþasa visae kiamiu sur re e kas laþasa naþa pimi ke ne, kiela sur komþasa kilia imi kila sane kiamiu narin sur m̃a tai. Pogos naþa tesuãa teiila ita

ke sanene na po, kila sane ita make ga tesuũa marana taaga,

¹⁵ a yoko ve sa visena na Tus Marua tai, naũa pisa sanini, sape

“Yar naũa war kinanena ve moki vim,

yoko naga kan vano kan make nena ga, ana siraunia visu sane pe kana re si tai poli,

a naga naũa pa ãar kinanena vitokaki ga, naũa pisu sane torok ga, yoko naga ve ve plasan re sur tai.”

Nau 16:18

Yoko Taetas wasuõe si va gar Koren

¹⁶ Nakonua rui pimi, nesuũa nesitom amiu paũisi, a nagane, nepisa potena paũisi pa Ntewa naũa naga kila pa Taetas sape sitomena mũarera tai sike e naga rui, sane naga monar iũasu iila amiu.

¹⁷ Ana pogos naũa mepisayu mesape iũasu mũalivin amiu, naga kekaran ga, komin naũa kiena sitomena tai sanene sike pa e naga rui.

¹⁸ A pe naga re ga taaga poli, ana yoko meligan imimi yar taũana tai iũasu amio naga, naũa naga kieta puruvi tai naũa suũare la na yo moki akilia ruru naga, komin naũa naga yar wo nalologonen Lologena Wo.

¹⁹ Suũare make ga la akekaran kiena yuũaena, ana amligan lua naga vena suũa yaloro amio imimi metelivi e kieta lepasa, pogos naũa mesuũa mekilapolo ke kilavaru na iilaen li nalelagaena lala gar Yerusalem. Mekila yuũaena nene komin naũa sinemimi sii la paũisi, a pogos naũa atol nalaena nene yoko ailan ruru vaũisi e ãelaga naiila laena naũa

tekila pan la, yoko avisirlua kia kiena Suře va metava.

²⁰ A mekekaran pařisi nađa kieta puruvi tařena nene taveve imimi, komin naga kilia iila imimi vena visuar ruruen pupia kilavaru nene nađa asuđa akoan poloia. Sinemimin mesape mevisuaria taveve ga kana mrapa wo ne lala, pe sinemimin re si meloge visena lađaasa imi sirau poli.

²¹ Sinemimin mesape mekila yuđaena nene sa nađa yoko mesmesu e navisuena kiena Suře, a yoko mesmesu mēna e visuena kiena yar tařena lala.

²² Ana amio lalua Taetas nene, yoko meligan puruvi tařena iđuasu visu amiu. Naga mēna ga pe yaru tai nađa memligan sur moki sike e limana rui, a mekilali mđa naga sanene pano mepisu nađa naga yepen mđen make sur la nene. Naga pe yaru wo tai na yuđaena, a pogos nađa nepisayu kiamiu řelaga wo la pania, naga řasine amiu pařisi sape visae imi yuđae re amio amiu vera wo vařisi.

²³ Sanene, e lepas puna kiau erau wo nene Taetas, monar avisu naga sane imimi ke lua narui nađa memiyuđae veraga vena iila amiuena, a e lepas na kieta puruvi tařena lua nene nađa yoko aimi amio naga, monar avisu la sane aim pun amiu e kia kiena suđare tařena lala na lepas nene, a aimi e kia kiena Kristo nađa kiela malena suđa kipian ke kiena řelaga wo lala.

²⁴ Ana sineun nesape nevisa van amiu sane pogos nađa la nene aim ađalivin amiu, kiamiu malena lala monar kipian mēna kiamiu řelaga

wo lala. Nesuñña nemlologon amiu ke pan la rui, ana popon manene sane la avisu kilale ruru ga na wa e kilamarala sa naña nepisa ga sur na lelaga, nesape kiamiu sinesiena keviu manene pañisi, a akilia ala navisawalena wo tai naña visayu amiu va va sumñare tañena lala.

9

Nalaena naiilaena va li na lelagaena tañena lala

¹ In na nesiri plan visena moki rui e lepas na laena na kilavaru naña toñar viravirania vena iilaen li na lelagaena tañena lala nene kiena ne Ntewa, ana nesitom ke nesape asuñña asitomañal ke sur la nene na wa.

² In na nekilia ruru sane amiu akekaran naña asikol e yuññaena nawar viraviranen kilavaru nalaena nene, komin naña e kas nanua ãaro pano, asuñña akila ruru ke naña ataulu kana narin kilavaru rui. A poglis naña nepa e lepas nene Masitonia nepisayu amiu pan la, nepisape amiu le Akaea lala asiar rui, a pogos naña la amloge miyur la towe ñaga, kila sane miilaar kiela sitomena pa metava vena monar amñareran laa sane vena kilaen kiela kompañasia.

³ Nepisayu amiu ke pan yaru tañena lala rui, sane amiu na amiyuññae po sanene sanene, ana sa ve akila re na piowa ga! Naga ke nanene narui kila sineun neligan kieta puruvi telu nene aimñasu avisuveve ruru amiu lia, komin naña nepisa pan la nesape monar awar viraviran kilavaru la nene rui, ana la akilia aimñasu alual sane sanene pona pere wa.

⁴ Visae pere wa, monar amiu akila vilaga, komin naþa lavis ke inu mēna neiñasu narui, a yoko neiñasu nemio le Masitonia laþasa, naþa nepisayu amiu pan la rui. Ana visae meiñasu melual naþa pe akila ruru re poli wa, yoko kieta kap mare, pupia mawaena van inu, a van amiu mēna ga, a yoko monar la avisave nepisa koskosin manene nayeluaren kiamiu kia pan la.

⁵ Nane kila narui nepisu sane monar nevisa van Taetas lala aiñasu sumon inu, ana ayuñae amio amiu vena war viraviranan kilavaru la naþa amiu apisaar asape awaria, awarpolo ruru suña ga, ana yoko meiñasun mowaria mowar vano. Nepisa sanene, ana ve asitom re sane nesuña noñareran amiun ke nesape monar awar nalaena nene. Waren nalaena na sanene, naga sur tai naþa ape sinewo, ana kiamiu sitomena ga kekaran nakilaena.

Navisa ruruena na þelaga nalaen suria

⁶ Ana visena tai ne nekilia nevisa manene van amiu sanini, yaru naþa mapila ve tokaki, yoko naga war ve tokaki, ana yaru naþa mapila ve moki, yoko naga war ve moki.

⁷ E lepas na kianen nalaena van yar taþena, ita make ga veve taaga monar tela ga ya naþa kieta sitomena pisaar sape tekila, ana pe pon re olavia naþa pe okekaran re laen poli, pona olavia komin naþa yaru taþena mñareran sape monar olavia. Ntewa pe sinenan re nene poli, ana naga kekaran manene yaru naþa mla suria molue kome kiena sinewo a e ga e kiena sitomena naga taaga.

⁸ Ana visae ko tai naña osuũa omla ke nalaena pano, ve ositom manene re, komin naña Ntewa kilia lamaran si nalaena wo la imi van ko, ve moki na ve moki. Naga kilia kila naña silaga owar toroki e sur make ga naña sinomãnia, a metavanja owar torokin naña owar sina ve na iilaen yuũaena wo taņena lala.

⁹ Nanene sane visena tai na Tus na Yauena Wa lala naña pisayu sinewo kiena ne Ntewa, sape

“Naga suũa kiakian lua ke nalaena wo lala pa yar la naña limala korena,

kiena ãelaga wo lala sulue na sike ne.” *Yauena 112:9*

¹⁰ A Ntewa, naga ke narui mla mrasa pan ita vena temapila e porotano, a naga ke narui naña kila kurusa ãar mrasa nakilaena kata kinanena ea, a ve sanene, yoko naga la ya naña sinetania vena kilaen yuũaena ea, a yoko kila kieta sur la imi ve moki, a yoko kila naña kieta yuũaena mesmesu lala awar mrasnela ve moki.

¹¹ Yoko naga visu kilale kiamiu ãelaga wo nene, naña silaga akekaran kianen suria, ana yoko naga lamaran sina ve moki vim van amiũ, a pogos naña mowar kiamiu nalaena va taņena la nene, yoko kila naña ita punu ga tevisa pupia potena tai va Ntewa komin navisa ruruena nowo naña naga suũa kian ke pan ita.

¹² Nalaena nene naña yoko ala vano, yoko iila li nalelagaena wa taņena la ve keviu naña asuũa apane ke pogos m̃arera, a yoko kila ayeluar m̃ena Ntewa ve keviu vaņisi, avisa manene potena vania vaņisi.

13 Yoko ayeluar Ntewa sanene komin naña yoko avisu naña pe asumña amlologon re ga lologena wo kiena Kristo poli, ana asumña amlogear mēna ya naña pisa, a yoko avisu nalaena naña amlavia keviu pañisi, naña yoko kilia iilala ve keviu a iila li tañena mēna lala. Ana pogos naña apisu sur la nene, yoko avisu kilale mēna sane kiamiu yumāena suña kipian ke sane kiamiu viawaena mārera ruruia a pe lelaga na sike ne.

14 Yoko avisu naña lemamiēna kiena ne Ntewa pule manene sanene e losinemiu, a yoko asitom amiu vano vano pñisa, yoko sinela ye amiu, yoko asumña alen wo amiu silaga.

15 Popon avisa potena van amiu komin kiamiu nalaena wo na sanene, ana po mēna ga vena ita punu ga tevisa manene potena van Ntewa silaga komin nalaena tanea naña naga mla pan ita, naña narina ne nane Yesu Kristo.

10

Pol mla navisatamēena pa la naña apisa kare kiena yumāena

¹ Erau lala, akilia sane in ga Pol nesumña nesiri piñasu, ana sineun nesape ala kiau visena e pñelaga mña nena naña sike e Kristo, naña naga moñau po a malumu po. Naga ke nene narui pñelaga naña nesumña noñikeyon kilaena pan amiu nanua sumo, ana nekilia mña sane yaru lañasa asumña apisa kare in ke vanonia. Asumña apisa ke asape pogos naña nesike nemio amiu, in na nemalumu manene laa, a nemaraun visena, ana asape pogos naña nesiri piñasu, nekila ga

sane in na yaru tai naþa nekilia nevis m̃arera, komin ga naþa nesike perinan amiu.

² Na nene na pogaga, ana monar akilia sane pogos naþa neim nom̃alivin amiu, visae nevisu sane popon nevis m̃arera, nekilia nekila ga narui. Ana sur ne nanene narui nesape nevisa van amiu, a nepisa awis pan amiu, neviun manene van amiu vena akilali napiowaena la nene vim wo towe laa ga wa, pogos naþa pe nepim nom̃alivi re pun amiu poli wa. Visae ve sanene, pogos naþa neiñasu, yoko ve sur re si tai naþa monar nevis m̃arera ea, ana visae peraga, in na pe nemaraun re nena nakuanen visena laþasa naþa m̃arera na m̃arera van la naþa asike loyuña e napiowaena la nene poli, a naþa apisa kare imimi ke ne, apisape memiyuñae taveve ke ga sitomena na yomarava.

³ Lelaga, ita make ga tesike e yomarava nini, ana imimi pe metaveve re kiena þelaga poli. A lelaga, mesuña mekila ke mara tai e yomarava, ana mara nena na pe nae re e yo nini poli.

⁴ Mesuña mesikol ke mara tai naþa m̃areraena lala nae ma e peni asuña akila ke pan m̃areraena lala na yo naloge viowaena, a suri na mara la naþa mesuña moþaria, pe ape na yomarava re nini poli, ana mekila ke mara moþar ke m̃areraena kiena Ninuna Wa naþa kilia yumu plan make yo m̃arera la naþa sur viowa la asuña atapolou ke ea.

⁵ Visae avisa visena viowa laþas na kaween yuñenaena kiena Suþe, ana mekilia metaulu woga. A visae avilaven, akilali naþa avisaluþar kiena

yumãena, ana mekilia meva mowarpoyo vena kilaen yar la akilia naga e kiela malena. Visae asumãalu amio sitomena viowa lala, ana mekilia mevilon yar la nene aimi naþa kiela sitomena imi m̃arera vena ataveve ga Kristo.

⁶ Yoko mekilia mekila ve sanene van amiu vano vano atamãan amiu, vena aligan amiu asu vatanon visena kiena Suþe, a siraunia, yoko mekila m̃a vano va e yo taþena la naþa yaru na kaween naga asike m̃ena ea.

⁷ Ana e lepas na yaru nene naþa pe purþes nen napiowaena nene, pona amiu asumã apisa ke asape sur punu ga pogaga komin naþa yaru nene pisape naga pe yeririna tai kiena Yesu yo? Ana awis, ve avisu re ga kulyepena, aþionli avisuveve sur lelaga naþa sike pae e maramiu rui. Naga pisape pe yeririna kiena Yesu na pogaga, ana naga sumã kila ke piowa, a popon naga visu ruru si kiena malena. Sinemiun ke yagogonen naga na wa, ana sanape, inu m̃ena ga nepe yeririna kiena Yesu, ana komin ya ne yepemiu mavin yagogon inuena?

⁸ Nepisa sanene, pona yoko laþasa avisa kare in sina avisave in na sineun ga netaulu luen suria, ana pe sa re nene poli. Pona lelaga sane pogos laþasa noþarwar inu paþisi yo, pona nesumã nepisayu manene sane imimi ke narui mesumã mepisuar amiu, ana pe nesitom re nesape nekila sur tai piowa naþa monar nemawania. Nesumã nepisayu amiu sanene komin naþa Suþe ga mligan amiu e limamimi nanua rui vena mekila kiamiu malena amio naga va metava. Visae amiu asitom avisave mesumã

mepis ke pan amiu vena kila kareen si kiamiu malena, pe sa re nena nene poli.

⁹ A visae asitom ke asape in na nepe yar na sinemimiena tai naþa nesuñã nesiri ke ñaki la nene piñasu vena kila sane monar amaraun inu, naga ñena nene pe mesmesu re poli.

¹⁰ Nekilia nesape laþasa asuñã apisayu in ke sanene rui, asape “Suwala, Pol sur nene, naga ga kiena ñaki lala apulen visena urmi la naþa ñarera, ana visae ovisu naga, naga sane pe yar malmale kar ga tai, a visae ologe naga visi, melala ga.”

¹¹ Ana sineun nesape nevisa van la nene sane popon avisu kilale sane ya naþa mesiriwal ke e ñaki, pogos naþa pe mesu re memio amiu poli, naga maran taaga ga sa ke e ya naþa yoko mesuñã mekila e maramiu, pogos naþa mesike memio amiu.

¹² Nepisa sanene, ana pe sineun re visaen sur ve moki poli vena kilaen si kiamimi kia va metava. Pe sineun re naþa meim sane yaru taþena laþas poli, naþa apilaven manene visawalen si kiela sur wo lala. Yar la ne sanene asuñã apisuveve ke kiela erau lala, a asuñã apisuveve ke ñena yar taþena lala, ana asitom asape la apo taulu la, ana naga nene pe yuñãena na wowe ga tai, komin naþa pona la punu ga nene apiowa maran taaga yo.

¹³ Sanene, yoko ve nevisayu manene imimi re va sanene, ana monar nevisa sur laþasa van amiu naþa atorokin yuñãena lala naþa Ntewa mligan e limamimi, a loyuñã ea, pano tol sur laþasa e lepas navisuar amiuena naþa mesuñã

mekila.

¹⁴ Pe mesitom re naña meva manene poli vena mekilali naña mesu metavan amiu, ana mesmesun naña mekilia mela visena lañasa naña monar avatanonia, komin naña ve sinemiu ñesan re sane imimi ke narui naña moñar ñesan ñlogena wo kiena Kristo pimi pimi yalen silau pimi tol amiu.

¹⁵ Visae tañena lañasa la apimpñes pun amiu, yoko ve mesitom re navisuar amiuena, pona nalaena visena la ne sanene van amiu. Ana sir-aun naña mesiar yumãena memio amiu, monar meva re laa na wa memio amiu. Sinemimin ga naña kiamiu naviawaena sumã kapuru silaga, a mekekarman manenea visae kiamimi yumãena kilia imi ve keviu laa sane, ve e re ga e kiamiu yo,

¹⁶ ana yoko mekekarman vañisi visae amiu akilia aiila imimi vena kilaen sane teva re laa ga wa vena lologonen lologena wo va e purvanua tañena lala na pun amiu lepas ñasa na vano, vena teva tetepo yomãrua e yo naña yar tañena lala pe apa amlologo re e poli wa. Sanene, visae pogos tai tevisayu yumãena lala naña yoko tekila e yo la nene, yoko tañatete si avisa kare ita avisave tesumã tepilaven ke ga mrasa naña molue e lokove kana yar tañena! E pogos nene, yoko la akilia sane tesumã tepisayu mrasa naña molue ga e kata lokove naña ita ga temapila.

¹⁷ Sitomena la nene apowo pañisi, ana popon ve towarwar itan re sur naña tekila, komin Tus Wa pis rui, sape

“Yaru naña sinenan vilaveena sur tai, monar

vilave ga e ya naña Ntewa kila.” Ser 9:24

¹⁸ A pe pon re ita ga teyeluar ita si poli, komin yar wo naña lelaga, pe naga re naña naga ga pisa si sape naga po, ana naga naña Ntewa ga pisa sape naga po.

11

Le Koren lala ataveve nalogena lala navisokanena

¹ Pona apulo visena la ãasa naña nesiri rui, asitom asape nepis wowe yo, ana awis, sineun nesape akila kiamiu sitomena ve piavi li laa sane e inu, ana yoko nekilali naña nevisa si laãasa.

² Ana monar nevisa visena la nene komin naña silaga nesumã nesitom amiu pañisi. Yoko nevisa ve sanini, sane nepisu amiu sane amiu na kiau sira m̃ee tanea tai, naña nepisrar vena talopa amio kiena yar mesmesu nene naña Kristo. Nemloge sane nepieluen ruru amiu nenaga, komin naña sineun visuar ruru amiuena vena ave lelaga e visaarena nene, a naga nene sa ga Ntewa, naña naga m̃ena ga pieluen ruru ita, pe sinenan re sape teligan naga poli vena teva si varau.

³ A inu m̃ena ga nemarau towe m̃aga sane sañisi yar tañena imi were si kiamiu sitomena va ve tañena. Sa nanua sumo ne, lom̃ara nene pimi pisa kotalia sira naña Iv, kila kotalia kila mloru e mlamulena piowa, ana pe sineun re nenaga vena pogos tai ve alelaga re si e Kristo, sa ãisi ve sinemiu sii ruru re si naga taaga.

⁴ Nepisa sanene komin naña nepisu kilale towe m̃a ãarimiu rui. Pogos naña nalologena

tai iñasu visayu Yesu tañena tai naña pe Yesu re naña memlologon ke poli, ana alelaga ke e naga veraga. A pogos naña ninuna tañena imi ñalivin amiu naña ve Ninuna re nene naña Ntewa mligania, apulan amiyopua ga. Pona pogos naña lologena wo tañena tai imi ñalivin amiu, yoko akekaran logearen naga veraga.

⁵ Nalologena tañena la apisa kotalia amiu ruru nenaga e sur la nene, ana nepisu naña amiu asumã asitom urmi manene laa e la. Amiu akila sa naña la ga ape nalologena e kieta yomarava nini, a amligan inu nesike tano, ana pe nesitom re nesape nanene naga mesmesu poli.

⁶ Lelaga, nekilia nesape yar lañas asitom ke asape in na pe nemlologo ruru re po poli, ana nekilia nesape pe yar re si tai naña kilia sur taulu inu poli, a nesitom nesape amiu apisu kilale suri nene rui, komin naña sumã ñalivi ke e yunãena punu ga naña nekila ke ne e maramiu.

⁷ Nekilia nesape e lepas na warpoloen kilavaru nene, yar lañas pe akekaran re nenaga, ana nemninue ga komin ya ne sanene. Pona asitom asape nepiun ke kilavaru nene ve kiau ga? Peraga rui, komin pogos naña nepimin nemlologon Lologena Wo kiena ne Ntewa pan amiu, pe nepisali re nesape ala sur tai van inu poli. In na nemligan inu nesike laa tano, vena nekilia nevisirlua amiu ava metava, ana pona amiu ñasia sinemiu karinun naña nekila sanene? Pona asitom asape in na nekila piowa ga naña pe nepiun re suri tai pan amiu e pogos nene poli yo?

⁸ Nekilia nevisa mesmesun van amiu nevisave e poglis nene, sumãare tañena lala asumã amligan

nalaena pimi vena iila inu, a nesuũa nakan ke ga kilavaru nene pogos naũa nemiyuũae kiamiu ke ne. Ana pe nekila re sur wo tai pan la nene poli e pogos nene, ana nemloge sane sa ga nesuũa nepinaun la ke ga.

⁹ A pogos naũa nesike nemio amiu, luũa plasa pano pano ũasa, ana puruvi la lua naũa akom Masitonia apitomi apisu kilale naũa nemloge ke piowa sanene ana apisuar ruru inu. Pe nepim netag li re pan amiu poli vanon sur tai, a nepisaaria sane yoko tařatete nekila kare amiu naũa nomřareran amiu nesape monar akila sanene pona sanene pan inu.

¹⁰ Nepisalar sanene komin naũa yepmavin yar la asuũa avisa kare inu asape visokar inun kiamiu kilavaru, ana yoko nevisawal kiau navisaarena nene va kar ga e yo punu ga e lepas nene Akaea. Pe nemarau re nenaga, nepisaaria e kia kiena ne Kristo naũa kiena visena lelaga sike e inu sane yoko nekila ga narui.

¹¹ Ana pogos naũa nepisa sanene, pona yar lařasa yoko avisave sineun ga kila kareen kiamiu kia, pona asitom asape pe sineu sii amiu re poli yo, ana in na pe sa re nena nene ũasa. Ntewa kilia ruru sane sineu sii amiu pařisi.

¹² Ana monar nomřareran ga sane visaarena naũa nepisa, yoko monar nekila ga narui, komin naũa sineun kemaren kapi kiena tařena la nene naũa asuũa apilave kar ke sanene. Asuũa apisali ke pan amiu asape asuũa amiyuũae lele taaga amio imimi, asape akila ga yuũaena ũa

nena naþa mesuþa mekila ke ne, ana pe sa re nene poli.

¹³ Yar la ne sanene ape nalologena navisokanena ga, amiyuþae pe mesmes re nena poli, ana asuþa akila kotalia amiu ke ga li na lelagaena lala, sane aþar marana nalologena lelaga lala kiena Kristo.

¹⁴ Ana monar ve ailan re naþa akila sanene, komin kiela yerkaþa naþa Yermare, naga þena ga suþa kila ke sanene rui. Naga kilia kila sane naga imi ve navisi wo na yomerarava,

¹⁵ ana tepisu naþa kiena yar lala na yuþaena akila kotalia ke þena yaru lala, akila la sane la ape yar na kilaen þelaga mesmesu. Ana pogaga, tekilia sane yoko ava ga narui aþisi e yo naþa mesmesun ga kiela yuþaena viowa lala.

¹⁶ Ana sa naþa nepisa rui, pe sineun re sane nevisi ana kila laþasa asape nepe wowe, ana visae sinelan visaena, ataþan avisa. Ana visae ve sanene, popon la akila van inu sa naþa akila pa wowe lala, sane ve avisaluþar in re sumo wa, ana ataþan nevisa ya naþa sineun nesape nevisa.

¹⁷ Pogos naþa nesuþa nepisayu ke kiamimi yuþaena, visae nevis vilaveena manenea, kila sane pe lelaga kemua naþa nesuþa nepis wowe, a yoko Suþe taþatete kekarania.

¹⁸ Pe pon re tevis vilave manene poli, ana in na pe nesa re yaru taþena la naþa asuþa apis vilaveena kiela sur lala na yomarava nini, komin naþa visae nevis vilave, nesuþa nepisayu ke ga sur wo lala.

19 A nepisu naŕa asuũa sinemiu miye ke yar taŕena lala naŕa amiu asitom ke sane la ape wowe, komin naŕa apisu sane la ape taŕena, pe atol re manmaruaena wo nene poli naŕa amiu asitom ke asape asike ea. Ana visae asitom ke asape in mēna nepe wowe, komin ya ne taŕatete akila kiamiu sitomena ve piavi laa sane e inu mēna?

20 Nepisu naŕa asuũa atamān ke pa nalologena navisokanena taŕena la nene vena akila sur viowa la ve moki van amiu. Akila van amiu sa naŕa amiu ape kiela yar na yuũaena lala, la amiyelelain amiu, aŕar kiamiu sur lala, amligan la asu metavan amiu, a visae sinelania akilia alipa maramiu. Amiu asuũa atamān akila sanene, ana sanape? Ana pogos naŕa nepisa ga visena tai pan amiu, komin ya ne yepemiu mavin yagogenena?

21 Pona popon manene visae in mēna nesuũa nekila ŕelaga kar la ne sanene van amiu, ana pona kila amiu akekan inu ga yo na wa? Ana pe sineyeena, in na nemalum laa paŕisi yo, in na pe netorokin re nekila nene poli yo?

Pogaga, nepisa visena nene, nekilia sane yoko yar laŕasa avisave nesuũa nepis wowe ke sina ga, ana sineun nesape visae nalologena taŕena la nene asitom sane akilia avis vilave komin naŕa asitom asape sur laŕasa na lepas pula naga po, ana in mēna nekilia nevis vilaveena sur laŕasa na sanene.

22 Visae asuũa avisir plan la ke asape la ape yer Epru, ana in mēna nepe yer Epru. Visae asuũalun avisave la ape yaru na lepas nene

Israel, ana in mēna nae yo nene. Visae aligan la metava komin naña apisape la ape lus kiena Epraam nena ga, ana in mēna nepe lus nene.

²³ Ana yoko neviun naviunena tai van amiu narui, sane la nene amiyum̃ae kiena Kristo pa tol yum̃aena naña inu nemiyum̃aenia? Peraga, inu nesitom sanē in na nekila po manene laa taulu la. Piowa ga naña nesum̃a nepisayu inu ke sina sanene, ana p̃arimiu la m̃arera paṽisi kila sane in m̃ena lavis p̃aruu ve wowe, nane nesum̃alu nepis sanene. Ana sur nene na lelaga paṽisi, naña in na nekila pupia yum̃aena la taulu la, yerkawa la akoven inu e yum̃a naloge viowaena yam moki taulu la, aṽe inu yam via nopulo p̃ele sina, a yam moki mēna ga naña pano-o lavis ga nemare.

²⁴ Nekilia sane yam lima rui, yerkawa kiena ne le Yu lala aṽe inu naña yam taaga, kovilva kakapuru e mosineu yam lualima yam telu pa ovari [39], ana akila sanene yam lima. Apisaluṽaria asape ve akila re va tol lualima yam ve vari [40], komin visae peraga, vena marena ga narui.

²⁵ Ana yam telu aṽe inu e laki lala, a yam si tai akove inu e kilavaru pano pano lavis nemare. Yam telu nokulu e sive naña waa talilu, e pogos la tai nene, sive mian inu m̃aga tol lemalo wetelu tai a legiena wetelu si tai.

²⁶ Pupia yalena piayavi lala, nemialoro e la yam moki manene laa, a e pogos la nene nepane sur la moki liu naña namarena ga. Wii lala na p̃alu lavis ayanlua inu nevano, yar la naña

11:23 Yum̃aena 16:23 **11:25** Yum̃aena 16:22, Yum̃aena 14:19

11:26 Yum̃aena 9:23, Yum̃aena 14:5

añevinaun ke yar lala añene inu, kiau yeririna ga lala sa naña le Yu lala apisu piowa e inu, a la naña pe ape le Yu re poli akila kare inu mēna ga. Nepa e yo nape, sane pulkumali, pona yom̄arua, pona losi, ana nepane pog m̄arera, ana silaga, puruvi navisokanena la nene, asuñña akawe inu.

²⁷ Sila ga nepa nemio yuññaena m̄arera a pog m̄arera, nepano naña nomomalio p̄ele ga, nepano naña moto kar inu pañisi a viso kar inu naña pe kinanena re nena poli, a nepano naña pe nom̄al re yo natapolounen miava poli.

²⁸ A metavan pog m̄arera la nene, silaga nesuñña nesitom̄al luen ga kiau yuññaena nemio suññare lala, naña sane sur tai naña urmi na urmi e kiau malena.

²⁹ A nesitom amiu m̄ena ga pañisi, naña visae nevisu amiu li na lelagaena yaru tai imi malumu, yoko kila neloge sane yepeu malumunia, a visae neloge naña amiu tai loru e mlamulena viowa, yoko kila naña neloge sineu laea pañisi.

³⁰ Nanene sur viowa la naña nesuñña nepisui, ana nepisu sane nemalumun manene laa yuññaena kiena Suñe, ana pe nekila re sur wo tai naña nekilia nevis vilaveena poli, kila sane nesuñña nepis vilave e pog viowa la nene naña nepanea.

³¹ A kieta Ntewa, naña naga pe Arimana Suñe Yesu, naña yoko teyeluar luen ga kiena kia, naga kilia sape pe nepisokan re poli, sur la naña nepisa ke ne ape lelaga make ga.

³² A pupia sur viowa si tai naña nom̄alia, pe nepisa re ma metava poli, nanene e poglis naña

nepa e pupia pulkumali naña Tamãskas. E poglis nene, ãarin suþe nae lepas nene naga yar naña Aretas, a kiena yerkawa naña naga pisirlua vena visuaren kiena pulkumali sinenan sape tarar inu, ana pitetalia kiena lokul na taren yaru lala apa asuwo make mralaea punu ga e yo nene vena ve noure re.

³³ Lavis atol inu, ana erau laþasa amiila inu, akonwan inu e los nen pupia karo tai, ana apiar e kilika, asuñalu metava e pupia arman kove na yo nene, amligan malumun pito tano vanua e yepas nen kove nene, pito malum mña pito tol tano, ana nomolue e karo nene nopure nepano.

12

Sur la naña Pol pisu e mñeniena

¹ Poga, nepisu sane visae nesuñña nepisayu in ke sanene wa, yoko taþatete vilon kiamiu sitomena imi wo sina, ana pogaga, nemloge sane sineun nesikol si visena nevisayu sur la naña nepisuia pona sur la naña Suþe kilologia pan inu e mñeniena lala.

² Ana yoko nesunyu yar kiena Kristo tai sumo wa, naña nekilia ruru naga, naña kas lualima taaga pa vari [14] þaro rui, naga suñña ga milan aþere naga pa kate ma e peni ma metava. Nemninue ga pa amio tasnena wetelu, pona apitom aþerelua ga ninuna pavini, Ntewa ga kilia.

³ Ana pe sur korena ga naña visae pa e tasnena pona pa e ninuna ga, nekilia nesape lelaga sane yar nene pavini yalen silau pisu loyuniña e mñata uniña tanea e yo nene.

⁴ Naga mloge sur mok liu naña pe navisawalen re si poli, naña pe visena re si na yomarava lañas poli naña torokin navisayuena.

⁵ Ana pogos naña nepisayu yar nene, pona amilan yo, apisape ke, yar nene, naga pe yar tanea tai naña ne. Ana sanape, visae nevisave pe yar tañena re poli, ana nepisayu in ke ga, pona yoko avisa ga avisave nanene naga pe pe sur re tai poli a? Sanene, nepisu sane visae sineun nevisayu pupia sur lañasa sanene van amiu, popon nevisa ga e kia kiena yar tañena, vena akekaran naña alelaga ea, ana e kiau kia, yoko nevisayu ga kiau narin sur lañasia.

⁶ A visae sineun nevis vilave e pupia sur la naña nekila, yoko tañatete si yar tai kilia visave nesuñā nepis wowe, komin sur la punu ga ape lelaga make ga. Ana pe sineun manene re nevisa sur la ne sanene poli, komin naña pe pon re nekilali aligan inu metava vanon sur lañasa naña pe apisuli re poli wa pona pe amlogeli re poli wa, ana in ga nesuñā nepisa. Sineun nesape asuñā avisuveve inu e yuñāena ya naña apisu nekila ke pan amiu, a e visena ya naña nepisa pan amiu.

⁷ A nepisu sane Ntewa mñena naga yepen mavin sape kiau sitomena va manene laa metava vanon mñeniena lala pona sur la naña naga pisa lologia ke pan inu, a naga mligan napiowaena tai sike e tasneu naña nemloge sane kurumol tai naña Yermare suñā miyur inu ke e silaga, naña suñā kila tasneu mlalaea, a suñā kila kiau sitomena suñā ga tano.

⁸ Nepiun tan Suñe vena lalua sur nene vetan

tasneu, ana pe kila re poli, ana yam lua sina nemleninia, yoko kana yam telu nena, ana peraga rui.

⁹ Ana naga pis ga pan inu, pisa sanini sape “Yoko kiau lemamiēna ga torokin uarar ko, komin kiau māraeraena kilia yuñae ve keviu manenea e pogos naña yuñae amio kiomā malumuena.” Visena ne nanene narui kila sane nekekarān nevisayu manene in laa sane, ana yoko nevisayu ga kiau malumuena lala, vena kila sane māraeraena kiena Kristo kilia yuñae kome inu sanene, sa naña naga pisa.

¹⁰ Sanene, vena kila kiena kia imi ve keviu manene laa sane, netamān sane nekekarān malumuena la se tasneu, pona avisu viowa e inu, pona nelual pog māraera lala, pona akila kare inu, pona neva nowarpoyo e sur viowa lala, komin naña nekilia sane pogos naña yepeu malumu, Kristo ga yoko kila nomāraera.

¹¹ Suwala! Nesitomāl ke visena la naña nepisayu e yo nini, nepisu sane lelaga, nepisi sa naña nepe wowe pañisi. Aviewo inu, ana po mēna ga naña apisu kilale sane amiu ke narui naña akila nepisi sanene. Nesitom ke nesape amiu ke narui yoko asumā avisayu ruru inu, naña akekarān sur wo la naña nekila pan amiu rui, ana peraga, asumā apisa kare ruru inu nena ga. Nekilia nesape in na nepe sur korena ga, ana pe nesitom re nesape in na nepiowa taulu nalologena navisokānen tañena la poli, ana vanon ya ne asumā amieluar la sanene?

¹² Popon asitomāl si sur la naña nekila likān amiu, naña pisawal inu sape in ke narui nepe

nalologena lelaga. Sila ga, kiau sitomena piavi ruruia vena yuñae malumu amio amiu, a nekila amiu apisu kile lala, amio sur nailanena lala, amio kile lala na nañareraena kiena ne Ntewa.

¹³ Nekila sur make ga pan amiu po pañisi, maran taaga e ya naña nekila pan suñare tañena lala, ana la pe apismumun re sur tai poli, ana amiu na apis liu wa. Sur ga tai naña nekila nemio la ana pe nekila re nemio amiu poli, pe nepiun amiu re poli nesape avisuar inu pona aiila inu, sa naña la akila, ana pona nane nekila pal e nene yo? Visae ve sanene, aviewo inunia, komin naña visae pona neviun ga sur ve moki vetan amiu vera na yoko akekaran in ga na wa?

¹⁴ Pogaga, nagane narui nesuñā nekila ruru ke nesape neiñasu nevisu amiu sina, naña kana yam telu ne narui. Nepisaar nesape yoko ve nekila re yuñāena van amiu, komin naña ve neiñasun re vena kiamiu sur la iila inu, a neiñasun vena neiila amiu. Nanene sane ata lala a auya lala amio narila lala, naña pe yuñāena kiena re nin sisi la poli naña avisuar kiela yermarua lala, ana yermarua ke la narui monar avisuar ruru narila lala,

¹⁵ ana visae sanene, in na nekekaran ga naña nekian make kiau suria, amio mñena kiau malena, vena iila amiueña. In na nekilia nekila sanene komin naña sineu sii amiu manene pañisi, ana nemloge piowa komin naña nepisu sane pog naña kiau sinesiena e amiu suñā pa manene ke metava, ana kiamiu sinesiena e inu suñā pito lilue ke ga tano.

¹⁶ Nepisa nanene komin nemloge visena

taþena e amiu. Asuũa apisu kilale ke asape pogos naþa nesike nemio amiu, pe nekila re yuũaena tai m̃arera pan amiu ve navisuarinena poli, a pe nakan re nena kamiu kilavaru poli, ana sitomena tai teke ga e amiu wa. Amiu apisa apisape in na nepe manmarua po e lepas naki-lakotaliaen yaru, ana asitom ke asape nesuũa nekila vinaun ke mrapa na visa kotalia amiuena vanon kiamiu sur lala.

¹⁷ Ana pe sa re nena nene poli þisa. Asitom ruruli la naþa nepitetalia la apim̃as pun amiu. Apisu naþa akila kare amiu e sur tai, pona aþar kiamiu sur laþasa pe kiau? Pe nesitom re poli.

¹⁸ A sanapen m̃ena pogos naþa nom̃areran Taetas sane naga amio kieta puruvi taþena nene, lalua monar am̃alivin amiu? Apisu naþa lalua akilakokanin ga naþa awar kiamiu kilavaru laþasa? Peraga, kom̃in imimi sane þegas taaga ga, naþa Ninuna taaga ga sike e imimi, a mesuũa metaveve mrapa na yuũaena taaga ga, naþa pe mesitom re nena naþa nakilaen yuũaena kiena Suþe vena mowar sur laþasa ve kiamimi.

Pol sitom manene paþisi sape pogos naþa va gar Koren yoko ve sanape?

¹⁹ Nesuũa nepisayu ke kiau yuũaena la sanene, pona asitom ke asape noþikeyon nek-ilalua kiau kia va metava e maramiu yo vena ve asitom re si viowa e inu. Ana peraga, in na pe nesitom̃al inu re poli, ana nesuũa nesitom̃al amiu ga, a visena la naþa nepisa, nepis sane yar kiena Kristo tai, e marana Ntewa, vena iilaen kiamiu malena.

²⁰ Nepisa visena la nene komin nemarau pañisi sane pe pon re naña nomãalivin si amiu poli, ana nevisu naña amiu asike e yo tai naña piowa pañisi e kiau sitomena, a nemaraun mñena ga sa ñisi yepemiu mavin inu. Visae ve sa nene kilia kila sane teveveyun ita, pona tesitom ita viowa, pona sineta kar ita, pona ve tesitom re si yar tañena ana tesitomãal ita ga veve taaga. E pogos la ne sanene, yar kilia viueli, kilia vismumun yar tañena, kilia vis vilave, a kilia mñaga manene mñena ga. Visae va sanene, ana viowa narui.

²¹ A nemaraun manene mñena ga sane pogos naña nowasuñe si neim pun amiu la nene, yoko nevisu kiau yumãena lala e amiu sane aviowa ruru make nenaga. A visae ve sa nene, yoko kila inu nemawan Ntewa vañisi, yoko kila inu neloge sane naga mligan inu nepito tano keviu pañisi e maramiu. Ana nepisu sane yoko monar ve sa ga nene narui, komin pupia mlamulena viowa naña amiu lañasa asumã akila ke ne naga pe ñelaga na kororaki na kolau naña kilaro navisaluaena naña Ntewa mligan pa yermñene amio sira vena atavevea, a pe apilon la re nena ea ñisa, ana amiu atañan ga naña la asumã akila.

13

Visena maro na weñege laena

¹ Erau lala, sa naña nepisa ne, nanene yam telun naña nemialoro naña yoko nekila vena neimi neyalial li mña amiu, a pona yoko yam ve telun naña nevisi van amiu komin napiowaena

nene. Nanene kila narui nesitoñal visena tai na Tus Wa naña pisa sanini, sape

“Pogos naña apa kumali apis pa yar tai vanon mlamulena viowa tai, monar yar ve lua pona ve telu naña akilia avisawal mlamulena viowa nene, vena kila sane avisu sane lelaga.”
Naw 19:15

² Nesitoñal nene komin pogos naña nepim ãesan noãarpoyo pun amiu yam lua nanua sumo ne, nepis nemio amiu la naña akila mlamulena viowa nene, nanene naga pogos naña nekila ãesania. A nagane nesuñã nepis ke sina ga yam lua pan la e maki nini, a visae neim nevis sina, naga nene kila kana yam telu nena. A sineun nesape nevisa van la nene, amio la naña asike e yepas nela, visae neiñasu nevis sina, nanene yoko ve nasineyeena to re si e inu narui, yoko neliãere la e nakoena m̃arera tai.

³ Amiu asuñã apisa ke asape popon nekilologia inu towe m̃aga sane ve lelaga naña Kristo suñã pis ke ãarpoyo e kiau visena lala, ana visae sinemiun sanene, popon aim ayagogon inu e poglis nene, ana yoko avisu ga na wa. Yoko avisu sane pogos naña Kristo sinenan kilaen kiena yuñãena e amiu, naga pe malum re nena ga, ana naga kilia yuñãe amio kiena m̃areraena make ga.

⁴ Pogos naña añear naga mare e laki torovia, tepisu naña tasnena pimi malumu nenaga, ana pogos naña suñalu e marena mali sina, naga pule ruru nenaga e m̃areraena kiena ne Ntewa. Ana imimi m̃ena memalumu sane naga, ana pogos naña mekila kiena yuñãena naiila amiuna,

mesuñã memiyuñãe ke memio ñãreraena naña Ntewa tañan pan imimi.

⁵ Sineun ñena nevisawal nesape nevisu sane amiu asuñã amlipere inu manene laa, ana sanape narui, tañatete naña amiu ga akilia alipere amiu re sina, sane kiamiu viawaena suñã ñãrera ke ga wa pona sanape? Avisu ruru amiu, sane asuñã apisu kilale ke sane Yesu Kristo suñã miyuñãe ke e kiamiu malena wa, pona peraga? A visae peraga, pona lañasa asike nena e malena naña Suñe pe su re nena e poli, a pe ape nalelagaena re naña pe lelaga poli.

⁶ A visae pogos tai visae sinemiun avisuveve ñena kiamimi malena, naga pogaga, ana sineun manene pañisi sane yoko avisu kilale naña Suñe suñã miyuñãe ke e kiamimi malena ana pe mekila pal re kana nin kinakinas tai poli.

⁷ A mesuñã memlen ke pa Ntewa vena yuñãe e kiamiu malena vena amiu ñena ve akila pal re suri tai. Visae ave sanene, yoko kilia kila ñena kiamimi kia wo, komin imimi ke narui mepian amiu, ana pe memlenwo amiu re poli komin ga kiamimi kia. Visae yar lala avisu sane memiyuñãe piowa sanape, nanene na pogaga, ana kiamimi pupia sitomena, sinemimin naña asuñã akilalue ga mesmes silaga.

⁸ A imimi ñena ga, sinemimin naña kiamimi yuñãena make ga mesmes ga e visena lelaga kiena Suñe, ve sinemimin re si kilaen sur tai naña welua si kiena visena lelaga vito tano.

⁹ Mesuñã memiyuñãe kiena ke ga, a visae pogos tai kila imimi meim memalumu, mekekaran

ga, komin naþa mekilia mesape pogos naþa meim memalumu, ana amiu aim añarera. Mesuþa memlotun ke ga na nene, sane yoko asuþa aimi awo manene silaga.

¹⁰ Sitomena ne nanene kila nesiri mþaki nene piþasu pan amiu nagane e pogos naþa nesike perinan amiu wa. Sineun nesape alogearia, a visae akila, yoko pogos naþa neiþasu taþatete nevis mþarera van amiu. Suþe mligan amiu e lumau vena nevisuar amiu, pe nakila kare amiuen re poli, ana nakila amiuena ava metava. A visae neiþasu nevisu ve sanape, yoko monar nekila mþarera van amiu e ga e ya naþa mesmesun nekila.

Pol pisa pokolemalo pan la

¹¹ Erau lala, nepim e kiau visena maro narui, nevisa ga pokolemalo van amiu. Awis, akilali naþa akila ruru kiamiu mrapa mesmesu. Alogear ruru suri la naþa nepiun tan amiu. Amiu punu ga ataþan ga aviranar amiu e sitomena wo tai. Asururu ga e þelaga namalumena, ana yoko Ntewa na sinesiena a na suþarena sike amio amiu.

¹² Pogos naþa asuþa avitawe amiu, atalopan ruru amiu, aviran pipimiu e kekarena wa.

¹³ Nalelagaena wa lala nae e nini apisa mþena kiela pokolemalo pan amiu.

¹⁴ Ana kiau leniena nesape yoko lemamiena kiena kieta Suþe Yesu Kristo, amio sinesiena kiena ne Ntewa, amio þaþagena kiena Ninuna Wa, asike amio ita make ga.

Inu na, Pol.

**Lologena Wo Kienane Yesu Kristo Kome
Kewo
The New Testament in the Lewo Language of Epi
Island, Vanuatu
Le Nouveau Testament en Lewo langue de l'île d'Épi
au Vanuatu — Niutestamen long Lewo lanwis, blong
Epi Aelan, Vanuatu**

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 28 Dec 2024 from source files dated 31 Aug 2023

ee028e1c-7e53-571d-8041-681daaf580e8